

四庫全書

集部

欽定四庫全書

集部

文安集卷一至三

詳校官庶吉士臣初喬齡

侍讀臣孫球覆勘

總校官進士臣朱鈐

校對官編修臣沈清藻

謄錄監生臣張裕孚

欽定四庫全書

集部五

文安集

別集類四元

提要

臣等謹案文安集十四卷元揭傒斯撰傒斯字曼碩龍興富州人延祐初以薦授國史院編修官應奉翰林文字遷國子助教告歸復召還天歷初開奎章閣首擢為授經郎與修經世大典累官翰林侍講學士總修遼金宋

三史卒於官追封豫章郡公謚文安事蹟具
元史本傳僊斯與虞集范梈楊載齊名其文
章叙事嚴整語簡而當凡朝廷大曲冊及碑
版之文多出於其手一時推為鉅製獨於詩
則清麗婉轉別饒風韻與其文如出二手然
神骨秀削寄託自深要非媽紅妮紫徒矜姿
媚者所可比也虞集嘗目其詩如三日新婦
而自目所作如漢庭老吏僊斯頗不平故作

憶昨詩有學士詩成每自誇句集見之答以
詩曰故人不肯宿山家夜半驅車踏月華寄
語旁人休大笑詩成端的向誰誇且題其後
曰今日新婦老矣是二人雖契好最深而甲
乙間乃兩不相下考楊維禎竹枝詞序曰揭
曼碩文章居虞之次如歐之有蘇曾其殆定
論乎顧嗣立元詩選載侯斯詩題曰秋宜集
今未見焦竑國史經籍志載侯斯集一卷今

亦未見此本凡詩四卷又續集二卷制表書

序記碑誌雜文八卷乃其門人錫喇布哈原作

變理溥化今改正 所編錫喇布哈字元普泰定四年

進士第九卷有送錫元普序即其人也所編

雖不足盡僉斯之著作然師弟相傳得諸親

授終較他本為善觀元詩選所載秋宜集中

曉出順承門有懷太虛絕句曰步出城南門

遙望江南路前日風雪中故人從此去乃割

裂漢樂府半首為俚斯之詩則所收必不甚
精矣乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

欽定四庫全書

文安集卷一

臨川女

元 揭傒斯 撰

我本朱氏女住在臨川城家世事趙氏業惟食農耕五歲
父乃死天復令我盲莫知朝與昏所依母與兄母兄日困
窮何以資我身一朝聞密信與盲出東門阿母送我出阿
兄抱我行不見所向途但聞風雨聲行行五里餘忽有呼兄

名兄乃棄我走客前撫我言我與趙世親復與汝居鄰聞汝
即赴死扶服到河濱我身盡沾濡不復知我身汝但與我歸
養汝不記年泔泔遵旋路咽咽還入城城中盡驚問戚促不
能言望門喚易衣恐我身致患再呼我母來汝勿憂飢寒汝
但與盲居保汝母女全我母為之泣我鄰為之歎喜我生來
歸疑我能再明況得與母居不異我父存我今已十三溫飽
兩無營我母幸康強不知兄何行我母本慈愛我兄亦艱勤
所驅病與貧遂使移中情當日不知死今日豈料生我死何

足憾我生何足榮所恨天地生不如主翁仁誰能為此
德妻公名起莘

夏五月武昌舟中觸目

兩髯背立鳴雙橈短蓑開合滄江雨青山如龍入雲去
白髮何人並沙語船頭放歌船尾和篷上雨鳴篷下坐
推篷不省是何鄉但見雙雙白鷗過

張君壽先生鵠山隱居

當日自期顏杲卿莫年羞見魯諸生膝兼多病終難屈

身為長愁視轉輕日晏典衣留客醉雨餘開戶看兒耕
淮雲楚樹暗如掃卧送年年江水聲

送趙履道虞叔常還江右

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鶴磯頭望君庾公
樓上

寄題九江義門陳氏壽安堂

匡廬之陰彭蠡涯七百餘載真良家

宋御書表其門曰真良家

冲和

鬱勃吹不散飛落南山萱草花往時冠蓋如流水撞鐘
鼎食三萬指詔書十度復租庸每歲朝廷仍貸米父慈
子孝則四方紀淨網明照閭里蓬萊水淺昆明空天開
地闊元氣通張公百忍澤未竭王母千年桃始紅南山
築堂三百步翠竹屯雲森玉樹忠厚必有神明扶淳樸
自是期頤具方瞳綠鬢紅氍毹春酒搖蕩香扶踈公侯
子孫始必復日為太夫人起居

正月十二日尋盧學士船至漢口留詩為別

晴江澹微瀾洩雲在層巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將入窈眇春猶淺新知遽相違餘悰何由展

黃尊師高軒觀鵞因留宿

開軒南嶽下世事未曾聞落葉常疑雨方池半是雲偶
尋騎鶴侶來此看鵞羣一夜潺湲裏秋先得細分

衡山縣曉渡

古縣依江次輕輿落岸隈
鳥衝行客過山向野船開
近嶽皆雲氣中流忽雨來
何時還到此明月照沿洄

題王山仲所藏瀟湘八景圖卷走筆作

瀟湘夜雨

淅淅暗江樹荒荒楚天路
穩繫渡頭船莫放流下去

遠浦帆歸

冥冥何處來小樓江上開
長恨風帆色日日誤郎回

煙寺晚鐘

朝送山僧去莫喚山僧歸相喚復相送山露濕人衣

洞庭秋月

潁氣自澄穆碧波還蕩漾應有凌風人吹笛君山上

平沙落雁

天寒關塞遠水落洲渚闊已逐夕陽低還向黃蘆沒

漁村晚照

定從海底出且向平沙照漁網未全收漁舟還下釣

山市晴嵐

近樹參差出行人取次多板橋雙路口此世幾迴過

江天暮雪

孤舟三日住不見有人家昏昏竹籬處却恐是梅華

以事暫如武昌發臨川

江轉欲無路山迴忽似圍客程秋共遠物色晚多疑
稍沙鷗集蔥蔥野樹稀武昌今夜夢定有故人知

女兒浦歌

女兒浦前湖水流女兒浦前過湖舟湖中日日多風浪

金匱先生集卷一
湖邊人人還白頭

大孤山前女兒灣大孤山下浪如山山前日日風和雨
山下舟輕自往還

送尹十六善叟謁告歸茶陵會葬賢兄處士十韻
八歲賴賢兄未埋猶望生旋聞日下葬敢戀世間榮得
告如無及嚴期況有程意長看路短義重覺身輕鄉樹
迎船出江雲入暮橫望山占驛堠聽鴈作城更但使能
臨穴猶堪畧慰情死生今古異去住別離并尚足醺知

已非貪美俗評匆匆不可盡迴首各沾纓

送黃五舅得武陵校官還辰州寓居省侍

寧上山頭種禾黍莫向他鄉作羈旅山田得雨尚有年
他鄉顛顚何人憐一身千里家何在全家更在沅湘外
獨樹鷄鳴楓葉飛荒村鴈沒蘆花碎親在窮邊望子還
子在長途衣復單居無寸田出無僕明年作音佐官當食祿

貧交行

驅車涉廣川揚帆陟崇丘結交四海內中道多慙尤朔

風厲苦節獨鶴橫九州朝拂三島樹夕過五城樓兩翅
偶寒影曠然何所求登高臨大江日暮萬里流時哉疏
鑿人八年忘外留出必益稷俱歸與夔龍儔進退兩不
疑功成垂千秋萬事日相敘恩情若雲浮吾心苟不渝
反覆安足仇自非天地外何能獨忘憂

曉坐張先生朝陽軒

朝日照高樹幽人方啓關蕭寥塵外事風葉滿窻間

別武昌

欲歸常恨遲將行反愁遽殘年念骨肉久客多親故佇
立望江波江波正東注

南康夜泊聞廬阜鐘聲

廬山三百寺何處扣曾雲宿鳥月中起歸入湖上聞入
空應更迴近瀑正難分遙想諸僧定香爐上夕熏

春日雜言七首

日月朝朝新何物能獨久常恐天與地變化亦已朽東
風闐然來茫茫浩無首起視桃李樹睽艷一非舊如何

揚子雲泯然空自守

朝出城西門孤墳何穹窿雄狐竄其西脩蛇出其東云
昔有狂士七尺才且雄平生無所賴屠狗涉春冬一朝
際風雲身貴位益崇死生好惡間咄喑生秋風氣驕日
憑陵家國兩蒿蓬子孫分散盡空有牛羊蹤

羃歷楊柳枝蒙茸春草齊天天誰家婦采桑臨路歧零
露沾其裳蛛絲卷其衣樹高身苦弱蠶饑行復遲辛苦
事姑嫜宿昔減容輝見者皆歎息此心知獨誰良人日

暮至醉問爾何為

啁啁田間雀啄啄常不給春水日已深網羅復相及既
無養生具日夕湯火急多謝雲間禽無為自羈紲

祝融九千丈瀟湘地底流洶湧洞庭野崩騰江漢秋上
有飛仙人身披紫雲裘昔者嘗相遇縹若乘丹丘同歌
黃鶴渚共醉岳陽樓思之忽不見獨立悵悠悠

我有琅玕草欲贈江東客出門道路長卷袂空歎息靈
苗世所尚良士余所惜神仙無千年耿耿誰復識

五歲能讀書十歲能賦詩十五事遠遊三十無所爲既
垂俯仰責復爲鄰里欺生計日已踈世態多瑕疵煌煌
金張門徒隸皆光輝日宴賓客集軒車如風馳一笑擲
千金片言委黃泥齊生獨抱琴來徃何迤迤

夢兩雛

阿英十二能辟繡阿牛五歲貪讀書辟繡成縷無人識
讀書有志令人惜汝父飄零汝母休吾親雖健俱白頭
雨聲斷道風驚屋阿婆獨抱諸孫哭

夢武昌

黃鶴樓前鸚鵡洲夢中渾似昔時遊
蒼山斜入三湘路落日平鋪七澤流
鼓角沈雄遙動地帆檣高下亂維舟
故人雖在多分散獨向南池看白鷗

遊麻姑山五首

并序

湖北憲使程公間居盱上二年矣五月二十日詔拜翰林學士又十日公與使者及諸客同遊麻姑山輒以覽歷所止賦詩五首

雲關

君子荷初服思至若無榮穆穆芳雨散悠悠蒼山行危
關擁霧黑飛衢緣雲青苔蘚滑如積杉松宵冥冥時逢
負苓翁忽聞流水聲舉足何益高矯然欲遐征徒隸各
忘倦矧彼高人情

飛練亭

神工擲天紳挂之兩崖間萬古輸不盡誰能測其端勢
割山石愁氣挾草木寒安得天風吹繫彼日月還麻姑

綠雲髮黝黝長不殘

湧雲亭

泉源出地底仰向雲中行
壁厓瀉千丈亂石皆騰聲
風霆日夜急雨雪虛空明
不有神物扶茲山應久傾
噴薄側飛鳥砮鉤愁百靈
仙家信為好喧聒何由平

三峽橋

兩山東飛梁下墜不測淵
誰開萬尋鐵逗此無窮泉
淙淙輒空曲洶洶投奔川
陽光下照之忽作龍騰天
常恐

桑田變中有瞿唐舡

麻姑壇

嵯峨仙都觀遙望丹霞天後有千歲松前有百頃田風日
夏颯沓烟雲晝葱芊羣彥一時集安知非列仙持觴起
相醺罷琴抗高言天道信悠邈人情何拘孿靈君不可
致落景詎少延仰雖慙冥冥俯實憂元元主人顧坐客
此中可忘年

盧學士奉旨南祀海嶽絲鍾陵相別聞尚宿留會

稽有懷奉寄

鍾陵一分手幾日過錢唐五日山陰路千峰海上涼烟霞含景氣草木識天香夙昔經行處風深轉不忘

病夜

素壁深藏獨客身桃枝薑肱只為鄰極慙供給煩賢友尚恐傳聞及老親蠶響戒寒相應起燭花連夜為誰新多情造物真豪縱盡力相驅病與貧

得程翰林揚州消息

皇明屬休期側席佇貞良游麟既集藪鳴鳳亦在岡君
子乘時興出錢何輝光車馬塞江介笳鼓凝羽觴時秋
風雨交四顧野茫茫晨鉦激中流飛旂忽異方蓄思遵
旋軌浮雲紛北翔道路間邦畿草木隕寒霜晷景倏易
流悲來但徊徨君懷經綸憂我負灾疾妨騫沉固異趣
情誼結中腸居下衆所夷在賤誰不忘宛緬廣陵翰胡
獨置我傍鬱悵憎愁思投袂睇莽蒼自顧匪茅茹委跡
任空墻淵淵賢達心悵悵情內傷

歸故園新居落成後作

親老身仍苦家貧歲更凶
掄材斤斧後發地草萊中
面勢看前跡歡呼集衆功
聊存今日意敢望昔時同
漂轉何多歲艱難且定居
隣人供菜菜穉子進詩書
稍覺牛羊遠無知蔓草除此園三百載亦復返吾初

山行

稍出羣山復涉溪
溪光山色冷相輝
青裙獨踞溪邊石
不顧行人自濯衣

寄題馮掾東臯園亭

時雨散繁綠緒風滿平原興言慕君子退食在丘園出
應當世務入詠幽人言池流澹無聲畦蔬蔚蔥芊高林
麗陽景羣山若浮烟好鳥應候鳴新聲和且閒時與文
士俱逍遙農圃間理達自知簡情忘可避喧庶云保貞
和歲暮委周旋

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合

石稜斜闌浪聲齊南風盡日迎歸客落月空江夢故妻
一室十人分數郡百年幾處候晨鷄

送趙仲遠甌寧

仍為令尹去如送武夷仙舊政閩人說新詩海客傳度
關風散暑下瀨月依船不奪循良意因知幕府賢

山莊晚立有懷舍姪沆督穫臨川

藪藪黃桑葉蒼蒼白竹峰居人爭野碓歸客背村鐘路暗
緣溪濕山寒著霧濃阿咸收稻未辛苦闕相從

哭王十良仲

深谷可為陵大海可為田唯有死者窮無由覩青天千古黃壤間萬古黃泉下精神與時息形質隨日化日落朝復生月缺望已盈不知死者別何時見形聲悲哉復悲哉已矣復已矣我友初五人今焉忽成四死者不復見生者別離多人生如春花美好知幾何欲為生者歡須念死者苦死生日相尋歡樂如糞土

雨述三篇

江南臘月天未雪居者單衣行苦熱連山郡邑瘴盡行
豈獨嶺南與閩越逋民穰穰度閩山十人不見一人還
明知地惡去未已可憐生死相追攀

近聞閩中瘴大作不間村原與城郭全家十口一朝空
忍飢種稻無人穫共言海上列城好地冷風清若蓬島
不見前年東海頭一夜潮來跡如埽

冬來一晴四十日三日南風當有雪不知閩嶺今何如
念我故人書斷絕劍南判官心所親甌寧大夫政有神

腐儒多事浪憂喜安得貽書兩故人

春暮間居寄城西程漢翁十五韻

迢迢魯城阿峨峨鳳凰山下有隱淪士能為淮漢言兩
日一寓音五日一承顏每談經濟事恒及離亂間言辭
多忼愾文字少凋殘不歎東逝川但憶南山田寧與無
心遊不受衆目憐褰衣必峻嶒散步亦名園舒卷信在
襟蕭寂固所安經春僂疾痡撫時增懦孱羣書亂藥裹
高卧掩荆關蹇余屬久要朝詣常暮還醜劣愧高情焉

知君所觀日出衆鳥語蒼岑滿樓端
申章寫深誼誦薄
何由宣

長風沙夜泊

長風沙風沙不斷行人嗟行人嗟
柰君何南風正高北
風起大船初灣小船喜移船更近
大船頭不獨風沙夜
可憂但祝行人好心事長江何處
是安流茅屋參差數
株柳時平尚置官軍守青裙老嫗
詫鮮魚白髮殘兵賣
私酒魚賤可買酒可沽他人心事
知如何

何郎失鏡詞

團團如月不曾虧家人親置枕中時朝朝將正頭上幘
時時攜鑷鬢邊絲古文宛轉何人造失來始覺今難討
街頭不值半緡錢古銅終較今銅好向人不敢再三尋
客裏空疑同舍心萬里相隨一朝別夜夜還瞻天上月
贈青城侯尊師次人韻

聞說名山采藥蹤多從雲去少人逢蜀江春老歸難定
燕谷寒來望轉濃案上僊經新長蠹匣中雄劍舊降龍

不知少日尋真處還在青城第幾峰

贈友

天道有恒運君子蹈其常時物自熙洽庶心亦惟康鄙
人寡慮思沴氣冒陰陽霜霰中夏零焉得不摧傷先聖
有遺訓血氣戒方剛懿彼老氏言舌齒分存亡反躬實
明哲觀色屢迴翔正德詎云害率欲乃非祥勿謂壘空
明不足輸景光勿謂徑寸莖不足載春芳推餘暨昏朝
懷哉安能忘

曉出順承門有懷大虛

步出城南門，悵望江南路。前日風雪中，故人從此去。

京城間居雜言八首

都城列萬雉，樓觀切飛霞。太液深蕩潏，廣寒高嵯峨。重
譯踰萬國，流聲竟四遐。既寵瑰異才，復保勛舊家。忠厚
企行葦，明照徹羲娥。永惟皇上德，世世襲亨嘉。

冀北多良馬，漁陽多壯士。馬休伏槽枥，壯士習農器。桑
棗竟中州，朝貢四方至。外無烽燧警，內有耳目寄。逍遙

放良時歡樂永不替

濟濟從臣內赫赫公與侯
伊昔從我皇守邊瀚海頭
荷戈十餘載力戰如已憂
寸策無遺用長智少淹留
勞多必重賞功大靡輕酬
意氣相傾動恩深身若浮
天子乘六龍垂衣臨九州
茅土亘河山甲第隘莊馗
四海仰光耀出入擁華駟
富貴欲如此寵祿信難侔
從軍亦云苦眷言享斯丘

朝從獵城南暮從獵城北
白馬喻飛翰輕裘如膏澤
塵

起如獸駭風高如鳥疾
隻箭落雙驚千金出俄刻歸來
拜恩寵樂飲過一石僮奴增意
氣賓客改顏色常恐丈
達士輕薄多瑕擿高門臨廣衢
秋風上荆棘

朔土高且厚民生勁而彊
榆柳雖弱質生植益繁昌
桃李大於拳棗栗充饌糧
誰謂苦寒地百物莫得傷
青青雲夢竹宿昔傲雪霜
移植於此庭不如芥與楊
竹性豈有改由來非本鄉

眇眇寒門士客途困臺城
上無公卿故下無舊友朋
裘

褐不自蔽藿食空營營四顧裁沴餘但聞號苦聲日負
道德懿敢懷軒冕榮節食慎所欲聊以厚我生

高步覽九州誰獨無與親同室不相喻矧彼途路人誘
誅更驅迫巧詐日眩真共美為善樂莫知與善鄰未足
保厥躬已謂貽子孫一言易為義一思易為仁世無魯
東叟何以慰心神

衆飈驚野草日夜委鮮腴嗟哉白楊樹高高凌玄虛朝
遊車馬中夕息思故廬塵衿難為潔野性非京都貧賤

不自保焉能戀簪裾賴有死與生可齊賢與愚

去婦詞 并序

江東有一士子留都下三年適娶一貴人女為妻久乃知其已有妻子矣一夕逃去因託去婦為之詩非徒欲傳其事抑以示風戒云爾

輕合鮮義終苟容希禮遇遠結萬里昏多為才名誤始與君結好不知君有婦有女嫁他人俱懷託遲暮青青牆下草生死牆下路娟娟道傍華零落無處所女子失

其身何以保貞素既垂百年意百年誰能度對鏡空悲
惜中心良難訴浮萍難為託一木無兩附棄舊屬新歡新
歡漸成故寧當中路析莫被他人去寧老阿母傍不受他
人妬騰身出房闥兩絕無復顧所願嫁他人甘心西山樹

四友詩

并序

四友者廣信王庭鈺良仲李商弼良佐武昌盧廷鸞子
儀同里熊坦從正也李亡已七年餘亦亡二三年余索
居京師每夕夢寐與四友相接傷其皆賢而無壽又與

予篤好迺作四友詩一以志余哀一以槩見其平生云
李得年二十三廬二十九熊三十四王四十有九

王兄負奇偉十四已應門倉卒遘閔凶盜賊蔽丘原衰
經從伯父慷慨安其人豪橫劇狼虎瞋目莫敢干降心
相款密共稱孺子賢時應州縣役調笑官長尊酬接雖靡
監講習日多聞激烈忠憤際委曲禮法間時平俗益康
放志農圃言有集曰浮湖感龍變嘗汎彭蠡見龍見遂
國課肆意墨龍悟解夏絕
陟獻思爲騫古笛振哀鐵清琴繁素絃每傷古人逝迸

淚尊酒前與我初識面已誓為弟昆雖謂天不仁中路
遂離分寥寥昂山阿黝黝硯井泉賓客一以散託夢與招魂
嘉木不叢生猶為造化欺繁霜凋其葉震風蕩其枝利
蟲齧其根飢禽啄其皮豈無雨露滋不得干雲霓李氏
年弱冠博通三氏詞援毫捷飛電吐氣裂豹螭信如海
上潮直若琴上絃朗如九秋月溫比三春暉志在躋聖

賢寧復顧所私一悟生滅理天地忽若遺

居卒時一日晨興有數道

人叩門謁求作白蓮庵記君援筆而就大為得意有頃忽奄然坐逝父母聞而趨哭之迎謂父母曰某兄弟幸

多死生命也勿以為憂既瞑一道人撫其背曰檀越檀越生好處生好處復瞪目視道人厲聲曰佛法本無生滅卒癸卯二月也莖時衆舉出城初不能勝忽輕如羽

茫茫後死者中夜獨漣漣

顏回蚤聞道短折非所悲

武昌故舊中盧生亦奇傑雄才傲當世高誼凌白日貧賤有相知富貴莫能折冠蓋如雲霧而獨與余密大德七年夏予有長沙役臨河與余分攬袂久嗚咽知心託生死誰能此離別千里竟相從風浪復炎熱青天入杯酒歌嘯中夜激便欲乘滄溟超遙送華髮行行亦云至

終當與君拆捨掉即長途惆悵如永訣謂余平生懷時
俗莫能達學不追古人終不願有室還聞起分教小邑
傍蕭瑟始為賢者哀那知遽淪沒樊山罷歡讌赤壁空
流月佇立想音形音形一何濶

親友日凋謝況我情所鍾熊子三十餘亦在九原中高
才祇促齡積善適為凶天道不可依人命如飛蓬夢寐
常相見烟若生相從亦知心不異矧復里閭同始君掾
韶學我心實忡忡歸來已三年微疾竟永終薄祿不救

飢一官非高崇獨令君子亡碧血冷秋風鄰曲思愛絕
山川談笑空名家失金匱檣櫓入公宮誰復繼粹溫徒
用相春容千秋瓊山路繚繞劍池東

賦雙陸

三五對參差高呼得采時猶疑雙出早每恨獨歸遲散
地偏難入全功或誤奇極知妨日力聊足審安危

泊安慶時再北遊

夜泊淮西郡寒生客子衣酒家臨岸閑野燒暝江飛雲

盡月初出潮平風漸微前年城下路此際正南歸

漁父

夫前撒網如飛輪婦後搖櫓青衣裙全家託命烟波裏
扁舟為屋鷗為鄰生男已解安貧賤生女已得供炊爨
天生網罟作田園不教衣食看人面男大還娶戲家女
女大還作戲家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

高郵城

高郵城城何長城上種麥城下種桑昔日鐵不如今為
耕種場但願千萬年盡四海外為封疆桑陰陰麥茫茫
終古不用城與隍

濟州初度

辭家計日逢初度遲日暄風在帝京曉起慈親望天北
行行初泊濟州城

楊柳青謠

楊柳青青河水黃河流兩岸葦籬長河東女嫁河西郎
河西燒燭河東光日日相迎葦檐下朝朝相送葦籬傍
河邊病叟長迴首送兒北去還南走昨日臨清賣葦圓
今日販魚桃花口連年水旱更無蠶丁力夫徭百不堪
惟有河邊守墳墓數株高樹曉相參

雜詩四首寄彭通復

日月麗中天列宿爛昭昭河漢高且深烏鵲以為橋寒
霜昨夜降時菊委嘉苗地勢西北雄終歲皆風飈玄工

宰萬物時至有榮消常恐光景遲不得與逍遙

區區九州內橫從數千里誰設山與河愚者分表裏京師天下本萬國赴如水珠犀從南來狗馬由西止浩浩荆吳船日夜行不已生材無定所一物孰非已皇天仁且廣君道亦如此我思古唐虞當日誰共理

巢由伏箕潁園綺居商顏洗耳甘自潔茹芝竟不還三傑足為理五臣安可攀高尚誠所貴孔轍奚獨環吾聞有隱淪多在衡霍間飯牛腹長饑百結淒以寒懷寶羞

自獻邈然老空山

脉脉我所思彭氏躡遐蹤婉婉若處子未曾出房櫳相
望四千里踰年闕相從五月君寄書九月達京中我書
欲報君書到歲已窮豈不懷繾綣無由覲君容參差天
際雲縹緲乘朔風羽翼不吾施翩彼南飛鴻君有高世
行我無適時功天命人得違出處諒非同

栢堂詩

并序

栢堂為劉母熊夫人作也夫人有淑德年二十五而寡

守志不嫁有子曰觀又賢作堂以奉其母請名於太史氏謂之栢堂而作是頌

鬱彼北堂言樹其栢其栢巍巍維木之特栢之始生于彼高陵雨露其凝金石其貞栢之既成鳳臆鸞膺言樹斯庭霜雪是憑雪霜浩浩其栢矯矯有美君子而弗偕老其葉藥藥其節桓桓其居安安永世式觀我堂既構我栢既茂天錫眉壽保艾爾後

文安集卷一

欽定四庫全書

文安集卷二

元 揭傒斯 撰

獻張平章

天厯肇玄朔坤輿集皇靈汴蔡既榛夷南海淪炎精圖
書入天府將帥功業成寶玉被親懿茅土列公卿庶類
奮休祥羣賢基太平明公紹鴻烈文來敵華聲出入三
十年惕然心靡寧論兵體安危攬轡思澄清矧宅股肱

地夙夜在王庭名高德益難位隆責匪輕聖心誠弘裕
臣節美戰兢唐虞登夔臯堯舜猶日升周召竭師保成
康措王刑昌明願同濟援筆播芳馨

題祝道士龍虎山先天觀圖

聞說先天觀重重絕壁環鳥啼青澗裏花落白雲間樵
子能長嘯居人識大還洞門無處認唯有水潺湲

二貞詩

關右有姬氏父子皆蚤世姑趙婦張皆以年二十五而

寡守節不嫁作二貞詩

關右有姬氏父子皆棄捐孀婦奉寡姑誓死各芳年膏
沐誰復理羅襦委篋間辛苦事蠶繅祭祀亦靡愆父母
既莫奪媒妁徒空言鳬鴈安所施幣玉視如烟寧與
枯瘁沒不為歡樂存婉婉桃李花春鳥何翩翩萬物各
知時姑婦獨纍然

史館獨坐

地負天逾近風高午尚寒虛庭松子落歌檻菊花乾撫

卷俱千古憂時有萬端寂寥麟父筆才薄欲辭官

周待制致樂堂詩

有堂渠渠在番之區維周壽母式燕以康渠渠有堂在
番之陽維周壽母式燕以康斯堂何有有蘭有芷垂佩
藥藥維周之子斯堂何有有蘭有蓀垂佩申申維周之
孫曰燕曰嘗孔時且具維甘維旨承于壽母母曰寧只
福祿凝只升斯堂只我心平只母曰嘉只福祿遐只升
斯堂只我心和只

馬氏巖溪圖

何處幽巖下復有清溪瀉霧氣散長林湍聲落平野石
宜白鳥憩樹想玄猿把誰獨此安居居人云姓馬

山水圖

幽人無世事高臥謝浮名山崦晴時出溪流盡處行還
聞有漁釣相問扣柴荆不掃門前路莓苔滿地生

送道士薛玄卿歸江東

知君此去漸難招只在人間已廓寥市上有時逢賣藥

山頭何處覓吹簫仙
巖華落溪流滿鬼谷雲開樹影遙
未必故山安隱逸
海天涼月夜蕭蕭

大明殿退朝和周待制

巍巍道德拱羲皇
濟濟威儀陋漢光
日射龍文宮女扇
風傳鷄舌侍臣香
中霄景氣浮雙闕
下界歡謠動八荒
詞館小臣何以報
皇圖聖壽與天長

祖生詩

浦城孝子身姓祖
自憐性命如糞土
生纔五歲遭亂離

有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在
看書未盡淚先流書云流落河南縣河南跼遍無由見
唐州境上忽相逢白髮蕭蕭霜滿面誰知喜極情轉悲
旁人更問初別時千生萬死到今日始為母子東南歸
東南迢遞閩山路入門猶記階前樹居人傳說盡相看
鷄黍提攜竟朝暮祖生母子真可憐少壯離別老大還
同時鄉井被兵者幾人骨肉能生全願生母子長壽考

四海升平永相保

孤雌行為郾城節婦作

有鳥有鳥雌雄相追哺雛未飽鳴且飛雛未長雄乃死
子亦隨朝朝暮暮唯孤雌長林廣野風日美步步不敢
離故棲燕雀搖颺差復池迴身側腦遞相欺誰憐孤雌
心到死終不移更有許州郾城徐氏母一生抱恨守空
閨

燕氏救兄詩

千金之子不死市楚人竟殺陶朱子生者可殺死可生
千金為重骨肉輕誰謂平陽有燕氏傾家乃出而兄死
弟再有兄兄見弟里閭驚嗟官吏喜嗚呼安得天下之
吏廉且循庶政如水無冤民

送華尊師以天壽節奉詔祀武當

靈時嚴漢祠神峰標楚甸羽人丹丘伯承詔馳嘉薦華
渚曜玉虹條風舞玄燕長淮南中瀉喬嶽雲間獻涉旬
歷峻趾梯空答弘願授簡香始升揭虔帝如眷天清翼

軫動地肅玄武見飛響迴更聞奇祥靜逾絢是中有真
侶蚤接諸方援胼胝負畚鍤鑿翠蓄雷電金芝產齋房瑤
雲冠巖殿祈禱無歲年會節方紛衍既協時君降又樂
明祀徧聖厯齊堪興豐澤周寓縣還歸報天子獨往奚
所羨

真侶謂張真人有道行

送馬雍古御史撫喻河西

我皇屬憂顧君子得安居孟春風且寒遣子以脩途四
牡何翩翩迴首睇神都我懷正紆鬱歆函忽已踰積雪

被長鬢萎者何時蘇
歸彼蓮花峰上出浮雲
衢白日皦以懸下視若
玄墟煙塵起西北原野
無定株行者中顧懷居
者念其廬黃河洶東流
乃自崑崙渠四海豈不
曠切若肌與膚親賢遠
讒人古以致康娛君子
誠多材乃用在馳驅秦
隴阻關塞歲月浩已徂
鞠躬盡明義足為世所
模

送周山人之遼東

物變風已暄庭虛雪猶在
每與君子違偏驚歲年改
名

山先夢到靈藥隨方采明月望行人雲槎隔遼海

李宮人琵琶引

鄆縣亢主簿言有李宮人者善琵琶至元十九年以良家子入宮得幸上比之昭君至大中入事興聖宮比以足疾乃得賜歸侍母給內俸如故因亢且乞詩於余遂作李宮人琵琶引其辭曰

茫茫青塚春風裏歲歲春風吹不起傳得琵琶馬上聲古今只有王與李李氏昔在至元中少小辭家來入宮

一見世皇稱藝絕珠歌翠舞忽如空君王豈為紅顏惜
自是衆人彈不得玉觴未舉樂未停一曲便覺千金值
廣寒殿裏月流輝太液池頭花發時舊曲半存猶解譜
新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召強理琵琶絃上音
琵琶轉調聲中湓堂上慈親還佇立回看舊賜滿牀頭
落花飛絮春風急

題上都崇真宮陳宮人屋壁李學士所畫墨竹走

筆作

玉京灤水上仙館白雲鄉虛壁數竿竹清風生滿堂微
吟弄寒影靜坐佇幽香有客仍無事淡然方兩忘

集賢大學士趙國公王開府慶八十應制

昭代雍熙日詞林賦頌時紫宸丹詔出甲第五雲垂裕
廟青宮裏王公玉樹枝朝趨陪綺角夕侍接龍夔際會
真難及飛騰已在茲暴公初繡斧方叔更藩維霜簡驚

風采天官肅羽儀還迎代邸入竟被漢文知位望躋三
少權衡俯百司每蒙天黼黻直許國著龜鳳歛廣寒殿
龍舟太液池羽觴春侍宴玉座夜觀碁德業前賢繼辭
華後進推高情晞廣受餘事擬徵珪全趙山河富瀛洲
日月遲九卿看采服八表表龐眉皇覽逢初度殊恩介
壽祺黃封中使出玉食尚饗移國老陳嘉慶

李韓公
作序羣

公播盛辭禮非前代有施及老臣宜福祿何人並忠貞

百歲期聖心誠念舊政用作臣規

陵陽牟景陽以名祖父之子孫負奇材勁氣而與
世不偶自台州教授入掾翰林一語不合竟棄
去不顧以詩為別

奇璞則之媒蛾眉妬之具悄悄君子心皇皇百王度高
風集大水日夜如吼怒不畏枝葉殘但恐本根蠹曉登
榮臺上天地一何巨白日光未吐羣星爛無數仙人五
雲車縹緲玉清路區區陰陽中可望那可遇忽聞金鑾
客歲暮仍南去不得與之同頓足毛髮豎

結羊腸詞

正月十六好風光京師女兒結羊腸焚香再拜禮神畢
剪紙九道尺許長撚成對綰雙雙結心有所祈口難說
為輪為鐙恒苦多忽作羊腸心自別鄰家女兒聞蹤至
未辨吉凶憂且畏須臾結罷起送神滿座懽忻雜顚顚
但願年年逢此日兒結羊腸神降吉

劉承旨父大司徒邢國公慶九十應制

聖主尊賢遂及親邢公盛事更無倫身躋九袞瞳方碧

貌過耆年鬢未銀鳩杖乍頌寧畏噎龍章海拜欲忘身
上公建土山河富先祿分壺雨露頻析木天清雲五色
梁園花發月重輪

錫宴梁氏園

三宮寵錫驚殊數四座稱觴

半老臣瑞錦欄徧迎化日薰金條脫照芳春素烟冉冉晴
熏上白雪泠泠艷曲新先世勲庸歸琬琰名家父子映冠
紳三槐已驗移居日五柳翻如寄傲人澗底桃花曾閱世
枕中鴻寶自頤神詞臣欲繼莊生作才薄何堪論大椿

小孤山次韻

小孤山前一迴盼蒼然始識孤山面隔江疊嶂開翠屏
絕壁浮雲飄素練憶昔初蒙翰林聘艤棹探奇不知倦
捫蘿涉級至絕項目極神開氣為變大江東匯彭蠡來
晝夜崩騰奔海甸笳鼓遙聞日月動帆檣忽度乾坤轉
舟人不識造物奇但趣急趨南風便蚤悟微官七載縛
底用區區厭貧賤深窻冷壁守編摩何異揚雄困雕篆
重來勝地歲云暮短景催人疾如箭天昏一火明山半
石底猶疑有雷電彭郎磯下寒浪湧坐客正說龍君傳

人生可喜還可憐世事堪違不堪戀明朝正廬復入眼
雖有此境何由羨武城先生獨好事名山每恨遊難徧
豐城客子無一錢但當作詩乞如願

贈別曾編修歸廬陵葬學士兄

孟冬涼風厲謁告歸廬陵阿兄在九原歲暮豈遑寧兄
昔事武皇海內希英聲意氣動人主文采何從橫時事
一朝異長揖去躬耕令弟紹芳猷榮足在承明如何奄
忽間南北隔死生方舟發京國日落烟霧青萬感緣中

來惕焉如有懲羈臣戀魏闕一夕魂九升君子恩義重
况此骨肉情情深不可忘悠悠道路長山川日夕改我
行殊未央稍出燕冀都已涉齊魯疆高天圍四野悵望
但茫茫道傍多古墳塋域遞相當荒草吹北風日夕下
牛羊不知何代人於此閱興亡自古既有死誰獨免摧
傷死者雖所同私懷詎能已塗路猶感傷况我兄與弟
世俗日衰謝常懼莫能起生者忽若遺誰復哀其死念
昔賢哲人一一去為鬼詩書捐篋笥采采當路子採藻

厠明廷幸與君子同矧在弱冠年已獲承其風家本聖
門後孝友世所隆何意手足親一別曠音容及我南歸
日舟楫復相從皦皦寒日高冥冥厲征鴻落帆滄江際
渺然忽西東努力慎所托無為謾勞躬

寄題臨川西澗范氏寓居

蟾塘塘更西幽澗總堪題流水花間住孤禽竹裏啼石
稜苔自合山徑樹相齊久客成真隱故園應已迷

尋舍弟將至東牢宿野店

歲暮尋我弟山行兩舍餘入雲攀磴道落日及村墟茅
店溪邊冷松林石上踈如逢武陵客風景未應殊

贈王郎

王郎楚狂士意氣飛秋霜讀書一萬卷下筆數千行富
貴視浮雲况肯矜文章十五恥閭里掉臂辭故鄉夜宿
東海月朝買西州航瞋目王公前結客少年場一飲或
一石一醉或一觴寧揖屠狗人不與俗士當千金不易
笑戚暮單衣裳阮籍在窮途英聲連四方鸞翮有時鍛反

愧燕雀翔世無劇孟交不及青樓倡燕趙如花人翠袂
黃金璫不識豪俊士空媚癡與狂王郎遠過我坐我枯
蓼牀終夕無酒飲撫髀歌慨慷平明別我去極目空茫
茫

沈逸人東觀招飲山館

野館青山下晴軒積雨餘招尋蒙遠客寂寞愧閒居空
翠沾盃冷殘雲度谷虛從茲結朋好隨處問何如

畫鴨

春草細還生春雛養漸成茸茸毛色起應解自呼名

題聶氏陶軒

開軒南山下日對南山雲青松俯前楹秋菊被中園翳
翳脩竹林清泉出其間歲晏農務息銜盃樂餘閒時從
隣曲游共稱稼穡難達人貴知己俗士多所牽以茲謝
簪紱委心此南軒列植既敷榮佳興日以繁讀書教兒
子餘事焉足言

送涂雲章訪舊武昌卻入京師

垂雲厲驚風萬里摩高圓蟠泥鼓巨浪豈顧九重淵毛
生入楚庭穎脫俄頃間粲粲徐公子長嘯起丘樊朝辭
豫章臺暮宿匡廬山大帆掛鸚鵡極目空波濶黃鵠錦
袍仙吹笙紫霞端相顧一笑粲青春滿南天黃金築高
臺更覺郭隗賢聯翩劇孟輩相逐入幽燕平旦九門開
劍佩踰五千豈無一字薦傾倒平生言東風杏花開待
我薊門前

歸舟

汀洲春草徧風雨獨歸時大舸中流下青山兩岸移鴉
啼木郎廟人祭水神祠波浪爭掀舞艱難久自知

小孤山曉發和蔡思敬韻

日落霞明錦浪翻厓傾石峭白雲間乾坤上下雄孤柱
吳蜀東南壯此關神物夜移風動地仙舟曉渡月漫山
回瞻絕頂登臨處空翠冥濛杳靄間

大信晚泊呈舟中諸公

千家楊柳江當門東梁西梁兩岸蹲連檣大艦集日昏

擬金伐鼓海上聞小江更出來石後前人立功後人守
大信花采石酒陌上相逢莫回首

白楊河看月

白楊河上看明月昔人曾見今人別茅屋數家河上村
化作三山白銀闕波平風靜棹歌來萬頃冲融鏡面開
今夜江南憶游子空瞻雲漢上昭回茫茫萬里燕齊路
北斗從橫泰階曙黃河東逝月西流明日南風過洪去

歌風臺和李提舉韻

萬里東歸火德開漢王曾此宴高臺沛中父老謳歌入
海內英雄倒載回湯沐空餘清泗在風雲猶似翠華來
穹碑立斷蒼烟上靜閱人間幾劫灰

題嚴陵獨釣圖

何事玄纁入里閭羊裘暫脫就安車空令太史驚同寢
猶把狂奴視報書一出聊為天子重諸公莫道故人疎
朝廷自足中興士且放桐江著老叟

題鼯鼠食瓜圖

種瓜中國予亦勤止瓜長而實汝則殘止雖則殘止予
敢汝仇天實汝生予將何仇汝食之甘既肆既開實之
食矣無傷予根根存而微惟予之窮根盛而實惟乃之
功

哭信州僊源觀徐尊師乃玄教大宗師張開府之
弟子也

玄霜搗罷世都遺葛屨蕉衫太古姿天上真人開府日
山中仙子閉門時空林雨過金芝老深谷雲寒白鶴饑

萬里馳書為永別
盧敖何處定相期

送蔡思敬還豫章有懷遼陽李提舉

來日能同去不同
獨攜別恨向秋風
眼看亂葉渾無定
心與浮雲併一空
黃獨山中歸自斲
玉梅溪上夢先通
莫嗤留滯京華者
更有遼陽送斷鴻

孔林圖詩

集賢待制周侯能修禮於孔林
侍讀學士商公圖之史官揭傒斯詩之

峩峩尼山蔽于魯邦篤生聖人維民之綱尼山之下有
洙有泗有蔚孔林在泗之涘維彼聖人教之誘之凡厥
有民則而倣之維彼聖人覆之載之凡厥有民敬而愛
之既誦其言亦被其服孰秣其馬于林之側既誦其言
亦履其武孰秣其馬于林之下六轡既同周侯之東薦
之侑之聖人之宮其音洋洋其趨蹌蹌其臨皇皇聖人
先藏商氏圖之式昭其敬載瞻載思罔不由聖

壽櫟山詩一首為吳真人生朝作壽櫟山其里山

名

峨峨壽櫟山
瀕洞雲錦溪
百里空翠合
諸峰南斗齊
卧斲月窟桂
坐聽搏桑雞
臨深測地軸
升高徑天倪
陰厓覆瓊藥
陽岡敷紫萸
懸泉聒空響
飛樹凌風嘶
側畏猿鳥墮
幽恐漁人迷
茲山不自高
與人作丹梯
赤松棲其東
王喬憩其西
浮丘前捧擁
安期後提攜
神君領天官
出入黃金閨
梅花照羽袂
天書函紫泥
歸期指松櫟
千歲猶未稽
飡和養靈源
伏智埽荒蹊
木公與金母
大笑

彭鏗低

壽王副樞

七秩懸車兩府稀
五朝遺老百僚師
寒梅看足行吟處
舊史評來坐嘆時
身退已將心共遠
名高轉覺世難遺
且陪嘉客霑春酒
政待武公歌抑詩

李將軍歌一首送李天民赴邵武軍口巡檢

李將軍材且武儒
冠換得兜鍪去身
疑南極老人星氣
食陰山雪毛虎雕
弧白馬金僕姑天
地昂昂此丈夫五

十方為求盜使人生何用苦詩書寄言邵武諸官長不

是尋常一腐儒

時中書以吏部儒選員多有十年不得調者奏以為閩廣諸道巡檢然多非其

人而天民式稱是選
老人星其常自喻

文安集卷二

欽定四庫全書

文安集卷三

元 揭傒斯 撰

題明皇出遊圖應制

明皇八駿爭馳道還是開元是天寶
長安花發萬年枝
不識韶華醉中老
奎章閣下文書靜
冕旒端拱唐虞聖
此圖莫作等閒看
萬古君王作金鏡

畫鷹

文梁五色條秋高意氣豪怒張兩目直霄漢豈與短翮
翔蓬蒿妖狐晝作猛虎嘯騶虞并與神麟逃嗟爾飽食
心空勞

題張使君棄官學道詩卷

至元天子朝萬國任丘使君謝病歸門前未罷車馬客
身上已著朝真衣致君堯舜在豪傑洗耳巢由何是非
棲雲觀裏青松樹惟有白雲終日飛

登祝融峯贈星上人

洞庭南桂嶺北衡山連延瀟岸黑中有祝融如結鬟嵯
峨七十二峯間祝融不自知千山萬山自迴環迴環面
面芙蓉起祝融正在芙蓉裏儼如天仙朝紫皇千官百
辟遙相望半夜每瞻東海日六月常飛滿樹霜龍拏鳳
攫熊虎躑雲山霧滅何時極我來正值太平時時有山
僧似疇昔憑高一覽四海空草間培塿安足雄盤盤羅
漢臺翕翕炎帝宮復恐九天上視我猶井中朔風日夜
相騰蹙谷老崖堅松栢禿古來鐵丸盡颺揚山上至今

猶版屋山僧勸我歌我歌徒自傷天下五岳嵩中央此
山與我俱南疆我今三十始一見北望中原天更長

送何太虛南歸

窮秋乍到深冬別來只俄然去忽然學士已分修史祿
道人特送賣丹錢單車欲發無三日幾處同行可百年
積雪堅冰愁客路徐州城下便通船

憶昨四首

天厯年中秘閣開授經新拜育羣才宮門待漏常先到

講席收書每後回
召試時蒙天語勞
分題不待侍臣催
滿頭白雪丹心在
太液池邊只獨來

宮草蔥茸禁樹齊
日趨延顥對凝暉
朝迎步輦花間立
暮送回鑾柳下歸
碧殿東浮蒼嶽合
金河北引玉泉肥
幾迴弘慶門前路
春氣濛濛欲濕衣

己巳羣儒映璧奎
端陽侍燕寶慈西
線分學士親臣送
詩賜皇姑御手題
注酒含春瑤露重
承塵轉午錦雲低
日斜共出西門道
既醉猶能散馬蹄

奎章分署隔窻紗不斷香風別殿花留守日頒中賜果
宣徽月送上供茶諸生講罷仍番直學士吟成每自誇
五載光陰如過客九疑無處望重華

題李安中白翎雀

白翎雀白翎雀每見灤河河上飛平生未識百禽性不
敢籠向江南歸

寄題胡氏園趣亭

日與世情遠學人聊治畦蔬多品類樹果各生成野

老過偏數山禽近不驚詩書吾所好農圃也須明

題文瑞圖

并序

常德之龍陽居多蜀士祠事梓潼君甚嚴祠前有池曰
景星咸淳癸酉蓮兩葉並蒂者六劉初登進士第延祐
甲寅兩花並蒂孫以忠登第天厯己巳花如甲寅城東
三雅湖蓮復三花並蒂哈喇丹獲獨步迪音馮天澤聯貢
而獲獨步迪音登第好事者寫以為圖邀余賦詩

蓮花復蓮葉並蒂更連莖並葉已不見三花兩花更有

情如何與人作嘉瑞偏向龍陽水底生龍陽家事梓潼
君花花葉葉梓潼神好在龍陽士汝但讀書更績文為
花為葉汝莫論

題南頓孔氏復明詩卷

失明非有故復明還自然方其失明時萬事俱棄捐外
雖無所睹內則常淵淵如未嘗有目不喜亦不憐如明
入地中明未嘗不全逍遙天地內如在天地先不助亦
不忘一氣自周旋不敢計此生敢計時序遷剝乃復之

始自坤還至乾忽如浮雲散還我蒼蒼天昔非果失之
今亦固有焉如何孔氏家母子仁且賢先後俱失明其
復皆十年十者數之終如月晦必圓養之固有道何疾
非所痊願言永保之母或忽此篇

奉同柯博士甘內掾下直賦

暮出閭闔門解鞍坐前庭泠泠草露白華月隔林生蟋
蟀奮哀響鴻鴈流遺聲常恐芳景晏不知寒節并萬物
肅將斂孤懷徒自盈捉衿激長謠棲泊諒難徵

賦得海上雲送良上人歸徑山

蕩蕩無邊涯悠悠何所之孤飛若有意羣往更無疑稍
拂扶桑樹還經若木枝迎陽成五色乘陰忽四垂作態
離仍合多情去却追因風過別島和月下蓬池且任從
龍去寧知到岸時惟應學空者澹泊與相期

吳子高悼亡歸岳陽

都門落葉滿遊子去京畿忽聽離鸞操遙逐秋鴻飛愁
霜曉入鏡淚雨夕沾衣烟樹黃河岸風帆采石磯平沙

迴渺漫寒宇暖熹微客心閒轉切鄉書近却稀夢聞兒
女泣行將童僕依竊慕漆園放誰云潘岳非乘濤慣下
險迴江望若圍武昌未易到更向岳陽歸

秋夜作

露下氣逾肅月高寒欲流落葉階前樹疎鐘城北樓衰
年對急景歸心臨暮秋當世非無意才薄徒淹留

進士張于高得邛州判官歸成都

邛竹山前負弩迎去年曾是一書生天寒劍閣猶車馬

雪滿繩橋正甲兵，即恐徵求民力竭。莫將憂患客心并，
六千餘里關河路不盡。深期遠別情。

題陶淵明歸興圖

家貧無酒飲，聊欲試弦歌。去家百餘里，邈若異山河。
江上日多風，浩浩水增波。門前五柳樹，繁蔭日婆娑。
秫田已成收，歸計當如何。

寄題傅尊師兄弟所作寧壽道院

鍾磬之山千萬峯，琵琶塵湖相疊重。兩翁入谷起臺殿，

半夜空山聞鼓鐘
猛虎時逢澗邊石
飛龍却是雲間松
黃庭書罷人難見
鴻寶披殘手自封
度壑采芝隨鹿跡
登崖望日躡雲蹤
已知塵世惟堪笑
不是神人定少逢
辟穀有方桃更美
園基無地橘相容
但餘一念封人祝
未與人間萬事慵

二月朔日雪中題歐陽少監所藏宋好古畫竹

晨朝下延閣
貽我翠琅玕
微霜著節勁
細霧入林寒
歌枝偏稱遠
壓葉更宜攢
孤石覆逾潤
橫波晴不乾
况茲

春雪裏相對五雲端誤當裁汗簡誰擬截漁竿惟應湘浦上歸共幽人觀

雲錦溪棹歌七首

雲錦溪中雲錦鮮好在高秋八月天西蜀錦江那得似西湖綠水更須憐

纔過浮石是藍溪溪上青山高復低山中泉是溪中水尋源直到華山西

藍溪南去到藍州水底蘄蘄石不流迴望朱宮雲霧裏

白雲深處更高樓

宮前梨浦白茫茫岸上人家不似牆能到此中還有幾
行人莫厭棹歌長

揚金橋望玉真臺臺下橋頭人往來崇文宮裏着華去
安仁縣裏賣薪回

挹僊亭下薛公橋紛紛抵暮更連朝唯有橋西楊與柳
無情長繫木蘭橈

溪上層層雲錦山垂楊盡處是龍灘不是孤舟來逆上

何人知道世途難

御書雪林二字賜趙中丞應制

聖主揮毫臨秘閣親臣執法坐崇臺祥雲五色從天下
彩鳳雙飛映日來政欲清如林上雪已聞聲奮地中雷
君臣千載明良會咫尺微垣接上台

題胡虔汲水蕃部圖應制

沙磧茫茫塞草平沙泉下馬滿囊盛曾於王會圖中見
真向天山雪外行聖德只今包宇宙邊庭隨處樂農畊生

綃半幅唐人筆留與君王駐遠情

題辛澄蓮華觀音像應制

至人不可測宴坐青蓮華珠纓被玉體白豪貫彤霞從
何得此相來置玉皇家

杜節婦詩

結髮事夫子長言兩相期語宴方婉孌生死遽分離室
中無長子堂上無翁姑生計日蕭條誰能心不渝良馬
不亂羣仁鳥不亂行昔者為夫婦今忍遂相忘生為董

家女死作杜家婦安能若流水東流復西注春秋陳時
祀蘋藻宿所供一朝祭無主焉得不忡忡灼灼庭中花
落落俱為實賤妾在空閨志願從此畢

題內府畫四首應制

韓滉土星像

五行土居中百獸牛有功土行降為神騎牛白髮翁有
土復有牛惟神賜年豐誰知韓滉意政與皇心同

曹將軍下槽馬圖

曹霸畫馬真是馬宛頸相摩槽檻下卓犖權奇果如此
豈有世上無知者朱絲不是凡馬韁天閑十二皆龍驤
曾從天子平四方畫圖彷彿餘驪黃華山之陽春草長

韓幹馬

韓幹畫出曹將軍幹惟畫肉猶逼真昂藏回顧欲飛去
老奚安知馬有神想當此馬未畫時朝刷吳越莫燕秦
煩轡長鳴風動地不數驊騮與騏驎當時用舍那知許
粉墨蕭條尚雄武千金駿骨何足論萬世長留羣玉府

宋徽宗成平殿曲宴蔡京圖御畫御記

東京諸蔡滿周行延福成平樂未央十畝松篁籠玉殿
九霄風露濕霓裳君臣契合同堯舜禮樂光華邁漢唐
明日圖成仍作記千秋留與監興亡

送秘書李道濟赴峽州幕

蓬萊道山芸閣裏赤甲白鹽蓮幕中十載同朝君獨去
三年佐政我難同大河水滿中宵雨鉅野樹涼清曉風
夷陵江頭幾日到迎親應先南飛鴻

奉送全平章赴江西

聖主恩南土明公起集賢直期凋瘵後共致太平年
金虎分符重文龍賜服鮮權綱兼將相標格近神仙
天地三江外星辰北極邊丹心齊出處素志在陶甄
請述江南事都非大德全但徼扶弱美竟坐抑強偏
無復同憂樂徒令舞智權平疇吹渤澥暗室仗戈鋌
貪黷明相訓忠良默自憐民心隨日壞世態與時遷
况復兵饑接仍聞疫癘纏誅求殊未已蝨賊轉相挺
若擬寬憂顧先須

解倒懸久饑寧擇食多病但求痊一語堪懲勸微機足
轉旋已知平似水更道直於弦遙想聞公志渾如望歲
然九重天上別百丈霧中牽日月明金節山河入畫船
四方初息馬五月正鳴蟬豐樂田多黍生香樂有蓮岱
宗標魯地廬嶽壓湖天水怪收崩浪山靈掃瘴烟歡呼
麟鳳出踴躍吏民先笳鼓趨雄鎮旌旗覆廣川下車和
氣應袖手頌聲延膏雨侵淮甸仁風扇海壖忠貞真世
篤調燮有家傳赤子皆同體蒼生且息肩龔黃須警策

方召在蕃宣

題青山白雲圖

蕭寥青山曉迢遞白雲生衆樹春已暗高原人未畊方
思看桃去復擬采苓行深谷無機事白髮枕松聲

桃花鸚鵡

嶺外經年別花前得意飛客來呼每慣主愛食偏肥才
子憐紅嘴佳人學綠衣狸奴亦可怕莫自戀芳菲

趙孝子

廬陵趙孝子四歲父行賈一去三十年家惟大母母大母已云沒而父行不歸兒長亦有婦母子聊相依從父自北來汝父父已死母子哭且問父死何鄉里聞汝父死時不知汝父處汝但欲往問京師多舊故再拜別阿母行行至京師自念不見父兒死無歸時乃有曾老者往昔與父善言汝父死處濱州利津縣徒跣二千里薄言至利津朱琪張文輩一一陳所因死以某年月葬以某木棺姓名某所題近在城南端城南冢累累翳然榛

莽中極目千萬塚能誰識其蹤行哭七日餘欲死不得
所生者無由知死者豈能語解髮繫馬鞍負之墳墳過
吾父倘有知髮解鞍自墮俄至一墳前鞍墮髮自解開
墳見前和題字宛猶在既見父姓名痛絕心始安亟骨
陳野祭禽鳥聲為酸隣老四面來驚歎未曾有相帥報
縣官縣官駭之久即日上大府大府咸異之次第聞中
朝行子正南馳行子行且傷哭踴如初喪路遥山川阻
何時至故鄉故鄉既云至塋祭無違禮母子永不離萬

事若流水聞者盡稱孝見者皆感泣期爾百歲昌望爾
百禄集兒今一無願願母長不老歲歲父墳前灑飯墳
上草

題姑蘇陸友仁所藏衛青印

白玉蟠螭小篆文姓名識得衛將軍衛將軍今何在白
草茫茫古時塞將軍功業漢山河江南陸郎古意多

廬山連尊師求真陽詩久諾而未作也一夕夢中
得之因書以贈

稽天之浸不可滅焦石之烈不可絕香爐峯頭按羽節
滿山桃花滿湖月

贈項鍊師

吾聞有一士邈在吳越間騎虎滄海上茹芝天台山年
約四十餘七星布其冠燕趙雖曠絕倏忽一徃還樵子
常見之徑去不可攀又聞好賣藥徃徃在市闌疾者得
寸匕立欲生羽翰吾常慕其人咫尺限河關道書讀萬
過不如一承顏弱志揜昏氣卑卑逐王官何為浪自苦

食息於人寰

送鄉人祐上人從師歸當陽

學道玉泉寺從師天子都
流年春事半歸路客帆孤
山勢遙連蜀江聲不入吳
故園如可到種芋有遺區

送蘇尊師歸茅山

華陽隱居者聞復有蘇仙
時向梅花下高枕石頭眠
劍匣出飛電琴心流暗泉
閒來京闕下夜夜夢雲邊

寄題張齊公廟

東安猛將張齊公十八奪父軍囚中至元召募起亡命
父子南伐收奇功酒酣一躍馬上立拔劍四顧犇雷風
十年轉戰江漢上萬里直挽安南弓乾清坤夷四海一
勲在旗常心帝室身封萬戶傳子孫誓不偷生汙天秩
天下豐盛大德年天子明聖宰相賢小臣劉深射功利
上疏自薦能開邊鬼方寡婦號八百嫂叔操戈自爭國
劉深一言取大官遠帥官軍臨險阨五溪運糧數萬家
哭聲震動湖南北發徒開道徑折節既勤其民大求索

斗量金珠谷量馬谿壑之欲安可塞此時張公亦在行
捐軀力諫皆莫克折節薄險伏四起劉深夜遁張公死
鳥飛不度山川愁坐看英雄化為鬼乃知自古守邊鄙
大忌邀功貴寧救張公廟食東海頭劉深梟首蠻烟裏
張公世為忠孝門劉深萬年穢青史兩家同死不同心
試與題詩作臣軌

寄題楊教授菊莊

歸人種菊處乃在東海涯幽香發清真正色間奇葩百

種猶未愜千株寧足多寒分石橋月晴通赤城霞特起
表陰祀羅生騁陽阿門巷掩蒿萊荒徑絕經過飲露咀
其英孰知年歲遐

番陽蕭性淵攜其祖將領所愛唐琴號霜鐘者還

自和林求詩六月三日午門宣赦後作

嵩州昔有蕭將軍讀書學劍天下聞南隨龍馬渡江去
尚有孤琴傳子孫孤琴云是唐人斲昔日軍中自行樂
至今猶存殺伐聲一鼓哀風振寥廓將軍之孫才且良

文能作賦武蹶張秦皇城下飲白馬祈連山中射白狼
時平好文不好武抱琴却歎儒衣誤昭王臺上看青春
彭郎磯頭夢歸路日長史館幽且閒正冠拂琴為我彈
京城六月日如火霜鐘半夜鳴空山南風自有虞廷操
可惜同心不同調捐琴決眼望青天今日天門有新
詔

送王伯循編修赴南臺御史

朝辭禁苑暮南臺驄馬翩翩道路開佐邑已知為治最

經邦正賴濟時才人情好惡非相遠民力凋殘實可哀
鵬鶚秋天須搏擊郊原恐有鳳麟來

寄題鄴下樊氏鍾秀園

鄴都雄地里樊氏好園林庭戶花陰合池臺樹色深佳
時惟飲酒永日自彈琴車馬如相訪流泉可洗心

題廖氏皆春堂

時清日月明心和寒暑平東風扇萬物華開語流鶯農
興水泉動蠶起桑柘榮牛羊被原隰麟鳳在郊坰少者

擊壤歌老者鼓腹行不知天壤內何物異吾生常願天子聖四海無苛征夔龍滿廊廟簫韶歌九成

大熱疾勢危甚項君子虛視之一藥而起為賦五

言一首為謝

天臺項子虛乃是列仙儔賣藥都市中疑是韓伯休欲見不可得不見忽相求神清骨秀聳蒼松倚丹丘又如霜空月下照千丈流時有揭子者卧病城南陬馳往施寸匕大暑生清秋人言死復生仰視行雲浮長揖忽不

見思之生白頭

周氏教山驛水木清華亭

周家亭子教山上斷隴連岡紫翠開晴日卷簾幽鳥下
微風倚柱白雲來松間漁艇時俱放竹外樵歌晚獨回
咫尺紅塵車馬地已知弱水限蓬萊

題趙照磨虛舟

剡木作孤舟乘風到處遊寧求觸無怒政用載能浮歸
共唯明月行隨只白鷗浩然江海上何懼復何憂

送毛真人還龍虎山

手綰銀章主秘祠翩然歸去忽如遺
塵湖龍井雲間上手綰銀章主秘祠

鳳曲鸞歌月下歛香逐蘅薇深更入
氣交梨棗靜偏宜鳳曲鸞歌月下歛香

南屏風雨平坡雪爭似山中夢覺時

南屏山在上都南
七十里歲扈從至

上都夏秋居焉平坡在大都西四十里西
山之上冬春居焉蓋皆所掌秘祠所在

故中憲大夫嶺北行省左右司郎中蘇公志道哀

詩

蘇公廊廟姿推擇起為吏論議動引經舉措必由義惟

時方大旱謂咎在寃滯決獄天乃雨凶年化豐歲流聲
滿山西憲府立羅致慨慷平生懷遂佐直指使受命安
邊鄙正色行使事邊臣既威服使亦免顛躓六曹收雄
材兩府資遠器激昂天下事徃徃見謀議十載拘掾曹
彌年困文字雖云富匡贊豈足盡材藝一命廁省僚鈞
稽得深弊銓選班爵冗出入錢穀細並緣出多門穿穴
肆姦利有如水上市驅去還復至因風一披蕩甕得免
蒙翳再命主賊曹持平獨不蔽恒求情中實動究法外

意功罪必誅賞善惡俱惕厲三命參宥密令聞益昭晰
和林跨大漠肇造此根柢東際瀚海頭西控流沙裔北
窮陰山外南倚兩都勢連營列萬里倉庾千萬計鎮以
磐石宗重以分省寄憶昔大德末成廟方厭世桓桓忠
獻王功大更多智武皇既踐阼宮闕始清閟越邸邸矜微
勞寵極心乃異國有社稷臣讒巧惑聰睿遂輟股肱任
往重藩屏繫有威如雷霆有恩若元氣畊鑿比中土什
伍相錯置士怠遠戍苦民見太平治道路無拾遺商旅

畢懷惠忠獻一朝沒武皇亦遐棄駿尋延祐中權相擢
天位磨牙吮人血掉尾恣狂獬戕賊骨肉親迫逐見危
墜天人共震怒降灾及茲地大雪深丈餘人馬相枕斃
重為朝廷憂夙夜靡寧志除吏超五等聞者盡驚避蘇
公拜郎中即日辭九陞厚祿非所榮高爵非所貴彼民
亦天民安得皆坐視兼程到官所發廩急周濟死者何
嗟及存者再生遂閭閻漸蘇息竭力補黥剝飛書九重
天請為兵民備募粟實塞下慎忽憚勞費天子賜問勞

名王致金幣至今賴長策當時已多忌如何方賜環及
國竟長逝都人走相哭行子為歔歔崩騰翔風迅慘淡
浮雲曳蒼松拔其根黃鵠斃其翅幸哉有令子名已注
簡記千秋常山下豪傑一揮涕

題羅稚川所畫臨川羅益謙溪居圖

迢遞臨川郡泱泱元獻里溪上君子廬閉戶青林裏連
山烟景晏斷岸寒沙靡日暮孤舟還荒村隔流水

寄題武寬則湖山堂

祝融九千七百丈六月飛雪灑洞庭攸輿學者武寬則
石鼓齋中窮六經氣橫瀟湘波浪白思入嵩華烟雲青
四千餘里到京國倒插五色鳳皇翎河西猛將今太尉
一見握手坐黃庭立呼愛子俾受業豈獨汝學我亦聽
援肩虎頭日侍側長刀大劍羅青瑩動陳忠義破肝膽
衆目睽睽開心局丈夫乘遇豈偶爾縱不我聽我則寧
嗟予官冷材力薄每辱奇俊哀矜屢天晴風靜輒過我
如病得瘥醉得醒不為湖山勞夢寐不為富貴疲心形

始知卓識出天性豈彼狗苟蠅營營方今夔皋滿廊廟
洪恩屢降無濫刑長材用世何不可大夫列卿如拾瑩
君如得位立行志慎勿學我空星星我今老矣何所稱
白雲深谷寒烟汀

十月十八日夜南郊齋宿夢先帝召見便殿手賜
橘花一枝有感而作

淚盡烏號不可攀傳宣忽降白雲間天花拜舞君王賜
夢斷齋廬月滿壇

寄題上饒鄭氏菊莊

上饒多隱者鄭氏善為方移居倪陽里種菊今成莊近
取徧吳楚遠求至帝鄉品類百十餘顏色不可常漑以
玉井泉樊以柳與楊晨興即造之不憂露沾裳有時忘
飢渴餐之以為糧門無催租吏家有白玉郎花前撫鳴
琴花下列壺觴興至輒痛飲飲罷卧其傍自謂得菊趣
不知與菊忘但恐秋景晏繁露結為霜盆盛虛室中虛
室仍面陽重簾護夕氣踈牖逗朝光亂以青青蒲水石

儼成行重得隱者心不辱桃李場玩物焉足計歲晚託
餘芳

題四清圖

一清曰王右軍平生富事業獨以能書聞遂令吳越士
至今學者猶紛紛于嗟乎王右軍

二清曰軒轅彌明偶然吟石鼎狂怪使人驚遂令韓吏
部至今妄得狂怪名于嗟乎軒轅彌明

三清曰玉川子忍窮吟月蝕天高叫欲死獨對烹茶婢

白頭赤脚老無齒于嗟乎玉川子

四清曰林和靖周程明聖學韓范輔王政獨對玉梅花
山色湖光耿相映于嗟乎林和靖

題新安許氏蘭秀軒

蘭生兮深谷漱流泉兮蔭喬木綠葉兮披披玉幹兮紫
蕤植之兮堂下播芳馨兮菲菲菲菲兮揚揚思君子兮
高堂絙琴瑟兮會友嘉肴苾兮薦芳襲芳兮佩秀宜君
子兮多壽

金少卿集卷三
夢顯墨梅

霜空冥冥江水暮江上梅花千萬樹無端折得一枝歸
一雙蝴蝶相隨飛

寄題永豐劉氏暖翠亭

孤亭萬竹中危坐自生風近與山光合遙連野氣通鳥
啼深不見泉響靜偏聰束帛休相汙先生道未窮

鷄山俯鷺溪亭子盡堂西流水茭蒲合陽林竹樹齊
桑烟外集賓客雨中攜萬事俱塵土詩成手自題

寄題信州德元觀何真人林園長春亭

長春亭樹倚雲開，百里湖山入座來。
淥水繞階時自照，好花如幄手親栽。
青雲每指尋真路，白髮頻登望母臺。

墓在前山

六月神龍起潭井，人間幾處待風雷。

題信上人春蘭秋蕙四首

深谷暖雲飛重巖，花發時非因采樵者。
那得外人知，孤芳不足幹奕葉。
自含滋，白石蒼苔路落花流水時。
山深風露冷何處，有花開直入雲林去。
香沿石澗來。

幽鼓不盈尺空谷為誰芳一徑寒雲色滿林秋露香

蔡七祖真人得朱文公所書讀書二字以名其亭

請賦

今人題遍古人書孔李通家意未疎萬箇猶嫌栽竹晚
百圍曾見種松初黃庭義密從心得白髮身閒對客梳
近有方平消息否紅蓮成碧藕成車

送陰陽教授赴瀏陽

青草茫茫接洞庭瀏陽江上好談經遙瞻紫蓋為南嶽

仰見長沙是壽星日晏投書招楚客
夜闌鼓瑟感湘靈
下簾高坐金錢滿
賸買鹽梅寄在庭

賦得春鴈送張郎中省覲揚州

東風吹歸鴈離離翔天側
朝發衡陽浦夕過陰山磧
嘹唳浮雲中萬里才一息
眷言思親者相望有南北

送聶太祝赴潮州錄事聶天厯潛邸舊人

三載從容禮樂間
仙曹新拜度梅關
春風忍過金陵道
夜月重經黃木灣
盜賊數州相應起
甲兵諸道幾時還

憑君細講安民策莫遣邊防一日閒

題俞氏看雨軒


慘澹來何處崩騰忽滿城
遙連四山黑近灑半江明
可愛華間濕偏宜竹上聲
中宵未可住高枕寄餘情

題江道士清虛館

遺紛極玄覽宴坐白玉京
日月朗朝夕河漢流無聲
冉冉玉童雙吹紫鸞笙
下視九州浮以四大瀛
萬劫猶一瞬逍遙樂太清

賦得吳歌送人歸吳中

三月酒如澗高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔閭城且奉千金壽寧忘萬里情



文安集卷三